



REPUBLIKA E SHQIPËRISË
KONTROLLI I LARTË I SHTETIT
K R Y E T A R I

Nr. 90/14 prot.

Tiranë, më 30/10/2020

V E N D I M

Nr. 114, Datë 30/10/2020

PËR
EVADIMIN E MATERIALEVE TË AUDITIMIT TË PERFORMANCËS
“Efektiviteti i politikave në lëvizjet migratore”

Në zbatim të planit vjetor, Kontrolli i Lartë i Shtetit, në kuadër të përmbushjes së funksionit të tij Kushtetues, zbatimit të Udhëzimeve dhe Standardeve Ndërkombëtare të Auditimit (INTOSAI, EUROSAI, etj.), sipas Programit të Auditimit nr. 90/5, datë 13.05.2020 realizoi auditimin e performancës me temë “Efektiviteti i politikave në lëvizjet migratore”. Subjektet në auditim ishin: Ministria e Financave dhe Ekonomisë, Ministria e Brendshme, INSTAT dhe Ministria e Shëndetësisë dhe Mbrojtjes Sociale. Kontrolli i Lartë i Shtetit, në këtë auditim synoi të vlerësonte politikat shtetërore për mirëqeverisjen e emigracionit dhe zbutjen e faktorëve që shtyjnë individët për t'u larguar nga vendi, si dhe veprimtarinë e institucioneve përgjegjëse për të siguruar mekanizmat e menaxhimit, administrimit dhe monitorimit të tij.

Në këtë auditim performance, grupi i auditimit, pasi shqyrtoi të gjithë dokumentacionin e vënë në dispozicion nga subjektet e përfshira dhe kuadrin ligjor e rregullator të fushës, gjykoj si më të përshtatshme për arritjen e objektivave të auditimit *qasjen pragmatike*, pra një ndërthurje midis qasjes sasiore dhe asaj cilësore. Në funksion të kësaj qasjeje u përdorën kritere të paravendosura në program, ku përfshihen baza ligjore e rregullative si dhe raporte të palëve të treta. Grupi gjykoj se ky aplikim siguron një trajtim shterues të fokusit të auditimit.

Në përfundim të punës audituese në terren, iu dërgua projekt raporti i auditimit subjekteve të audituara: Ministrisë së Financave dhe Ekonomisë me anë të shkresës nr. 90/7, datë 30.06.2020, Ministrisë së Brendshme me anë të shkresës nr. 90/8, datë 30.06.2020 dhe Institutit të Statistikave me anë të shkresës nr. 90/6, datë 30.06.2020.

Pas respektimit të afatit për observacione nga palët e interesit, Ministria e Financave dhe Ekonomisë nuk ka paraqitur komente mbi Projekt-raportin e auditimit. Ministria e Brendshme nëpërmjet email-it zyrtar, më datë 23.07.2020, ka dërguar komentet e saj në lidhje me rekomandimet e lëna nga grupi i auditimit, por nuk ka dërguar kopje fizike të tyre në institucion. Instituti i Statistikave ka dërguar observacionet e tij mbi projekt raportin më shkresën nr.102/2 prot., datë 29.07.2020, po ashtu nëpërmjet email-it zyrtar.

Në përfundim, pasi u njoha me raportin përfundimtar të auditimit dhe projekt-vendimin e paraqitur nga grupi i auditimit të Departamentit të Auditimit të Performancës, shpjegimet e dhëna nga subjektet e audituara, mendimin për cilësinë e auditimit nga Drejtori i Drejtorisë së Standardeve dhe Sigurimit Cilësisë, vlerësimin mbi objektivitetin dhe cilësinë e auditimit nga Kryeaudituesi, Drejtori i Departamentit të Auditimit dhe Drejtori i Përgjithshëm, në mbështetje të neneve 10, 13, 15, 25 dhe 30 të Ligjit nr. 154/2014, “Për organizimin dhe funksionimin e Kontrollit të Lartë të Shtetit”:

KONKLUDOVA

Në rastin e Shqipërisë, përtej kalimit të periudhave të pikut si ato të viteve 1990-1998, ende sot raportohen shifra të larta të emigracionit në raport me popullsinë mesatare. Akoma më shqetësuese për vendin paraqitet situata kur migracioni neto (diferenca midis imigracionit dhe emigracionit) vazhdon të jetë në vlera negative dhe në rritje. Nxitësit kryesorë vazhdojnë të jenë arsyet ekonomike si papunësia, kushtet e vështira të jetesës, por kanë dal në pah edhe konsiderata të tjera si ato të bashkimeve familjare, studentët, azilkërkuesit dhe refugjatët. Në një sektor të tillë ndërsektorial, koordinimi dhe bashkërendimi ndërinstytucional, kontribuon jo vetëm në qartësimin e roleve dhe përgjegjësive eficiente mbi mirëqeverisjen e emigracionit, por edhe në evidentimin e mekanizmave të saktë dhe të dhënave të plota e të mjaftueshme, mbi të cilat të hartohen politika dhe objektiva efektive.

Gjatë kryerjes së këtij auditimi, grupi i auditimi u përpoq t'i jepte përgjigje pyetjes kryesore: **“A është efektive qeverisja e migracionit nga MB dhe MFE për periudhën 01.01.2015 – 31.12.2019?”** dhe në përfundim u arrit në këtë mesazh auditimi:

Emigrimi i shtetasve shqiptare për motive punësimi sot rregullohet nga një ligj i papërditësuar, i cili sot zbatohet kryesisht në funksion të qëllimit dhe parimeve të përgjithshme, por jo për sa i përket veprimeve procedurale. Ndryshimet e shumta në strukturat përkatëse dhe mangësitë në identifikimin e autoriteteve përgjegjëse kanë bërë që një pjesë e madhe e dispozitave të tij të jenë të pazbatueshme.

Për më tepër, angazhimi i dokumenteve strategjike dhe institucioneve përgjegjëse të fushës është drejtuar kryesisht drejt riintegritimit dhe rikthimit të personave të larguar, duke neglizhuar shtetasit e kualifikuar që përbëjnë potencial për të emigruar.

Megjithatë dëshira e shqiptarëve për t'u larguar nuk diktohet drejtpërdrejtë nga mangësitë e kuadrit ligjor e rregullator. Arsyet që i shtyjnë ata për të emigruar janë kryesisht ato ekonomike, standardet e jetesës, papunësia, rrogat e ulëta, por edhe mundësia për një arsim më të mirë apo mungesa e shpresës se gjerat në vend do të përmirësohen. Mungesa e të dhënave statistikore të sakta dhe bashkëpunimi i ulët ndërinstytucional për të siguruar informacion cilësor mbi migracionin, rrezikojnë zbatimin me efektivitet të politikave migratore.

Nisur nga konkluzionet e mësipërme të veprimtarisë audituese, duke synuar përmirësimin e mëtejshëm të rezultateve:

V E N D O S A:

I. Të miratoj Raportin e Auditimit me temë **“Efektiviteti i politikave në lëvizjet migratore”**, të ushtruar në Ministrinë e Financave dhe Ekonomisë, Ministrinë e Brendshme, INSTAT dhe Ministrinë e Shëndetësisë dhe Mbrojtjes Sociale.

II. Të miratoj rekomandimet e përcaktuara dhe të kërkoj marrjen e masave për sa vijon:

Për Pyetjen: A është i plotë kuadri rregullator në fuqi për menaxhimin e migracionit?

Konkluzion:

Mospërditësimi periodik i Ligjit nr. 9668, datë 18.12.2006, “Për emigrimin e shtetasve shqiptarë për motive punësimi”, ndryshimet e shumta në strukturat përgjegjëse dhe mangësitë në identifikimin e autoriteteve përgjegjëse kanë bërë që një pjesë e madhe e dispozitave të tij të jenë të pazbatueshme

sot në praktikë, duke cenuar rregullimin ligjor të një kategorie të gjerë të migracionit, emigrimin për motive punësimi.

Fokusi i autoriteteve në drejtim të fenomenit të “largimit të trurit” është thujse inekzistent. Ai përmendet tërthorazi nga ligji nr. 9668/2006 dhe nga Strategjia Kombëtare e Diasporës 2018 – 2024, por pa propozuar ndonjë masë konkrete për parandalimin e tij. Angazhimi i dokumenteve strategjike dhe institucioneve përgjegjëse është drejtuar kryesisht drejt riintegritit dhe rikthimit të personave të larguar, duke neglizhuar shtetasit e kualifikuar që përbëjnë potencial për të emigruar.

Mangësitë në plotësimin e Regjistrimit të emigrantëve dhe në regjistrimin e të gjithë personave që emigrojnë nga vendi për më shumë se 6 muaj, përkatësisht sipas nenit 12 dhe 30/2 të Ligjit nr. 9668/2006, kanë bërë që shteti të mos ketë të dhëna të sakta në lidhje me lëvizjet migratore.

Bashkëpunimi ndërinstytucional ndërmjet institucioneve të përfshira në fushën e migracionit nuk ka qenë i rregulluar më një akt nënligjor në vazhdimësi. Ai ka ekzistuar në kuadër të shkresave të përbashkëta dhe shkëmbimeve të informacionit, atëherë kur është kërkuar nga dokumentet strategjike në fuqi..

Për këtë rekomandoj:

Ministria e Brendshme dhe Ministria e Financave dhe Ekonomisë të informojnë nëpërmjet një relacioni zyrtar Këshillin e Ministrave, në lidhje me të gjithë problemet që hasen në zbatimin e Ligjit nr. 9668, datë 18.12.2006, “Për emigrimin e shtetasve shqiptarë për motive punësimi”, me qëllim që KM të propozojë ndryshime ligjore ose miratimin e një ligji të ri që rregullon emigrimin e shtetasve shqiptarë për motive punësimi.

Menjëherë

Ministria e Brendshme, Ministria e Financave dhe Ekonomisë, Ministria e Shëndetësisë dhe Mbrojtjes Sociale dhe institucionet e tjera të përfshira të ngrenë një grup pune, i cili do të vlerësojë në mënyrë periodike zbatimin e ligjit të emigrimit të shtetasve shqiptarë për motive punësimi dhe do të propozojë ndryshime të mundshme.

Pas zbatimit të rekomandimit paraardhës

Ministria e Financave dhe Ekonomisë, së bashku me autoritetet e tjera të fushës si Ministria e Shëndetësisë dhe Mbrojtjes Sociale dhe Ministria e Arsimit Sportit dhe Rinisë, të hartojnë programe që trajtojnë parandalimin e largimit të personave të kualifikuar drejt vendeve të tjera, në zbatim të detyrimit ligjor.

Deri në Dhjetor 2020

Ministria e Brendshme të hartojë një plan të brendshëm, me qëllim bërjen të mundur zbatimin në praktikë të detyrimit ligjor për regjistrimin e shtetasve shqiptarë, të cilët largohen për një kohë më të gjatë se 6 muaj nga vendbanimi i tyre në Shqipëri, të cilët duhet të deklarojnë vendbanimin dhe kohën e qëndrimit në shtetin ku ata shkojnë.

Deri në Dhjetor 2020

Ministria e Brendshme, Ministria e Financave dhe Ekonomisë dhe Ministria e Shëndetësisë dhe Mbrojtjes Sociale të bashkëpunojnë për të hartuar një kuadër për vlerësimin e detajuar të statusit të zbatimit të konventave të ratifikuara dhe ndikimit të tyre në garantimin e të drejtave të migrantëve.

Menjëherë

Ministria e Brendshme, Ministria e Financave dhe Ekonomisë, Ministria e Shëndetësisë dhe Mbrojtjes Sociale dhe institucionet e tjera të përfshira të bashkëpunojnë për të hartuar një kuadër për rishikimin e rregullt të ndikimit të akteve ligjore në mirëqeverisjen e migracionit. Kuadri duhet të përfshijë shprehimisht aktivitetet e nevojshme dhe indikatorët që vlerësojnë efektivitetin e masave të marra.

Deri në Dhjetor 2020

Ministria e Brendshme, në bashkëpunim me DAP, të marrë masat e nevojshme për të kryer një vlerësim të thellë të kapaciteteve institucionale për qeverisjen e efektshme të migracionit, duke parë edhe mundësinë e zgjerimit të burimeve njerëzore në dispozicion, në përputhje me parashikimet buxhetore të Strategjisë.

Menjëherë dhe në vazhdimësi

Për Pyetjen: A orientohen saktë në objektivat strategjike faktorët që ndikojnë në largimin e popullsisë?

Konkluzion:

Mungesa e një Regjistri të plotë për emigrantët dhe të dhënave të sakta nga institucionet rrjedhimisht bën që këto të dhëna të kenë një marzh të caktuar gabimi. Diçka e tillë konstatohet edhe nëse shqyrtohen shifrat që nxjerr INSTAT dhe ato që dalin nga anketime të tjera për migracionin.

Faktorët ekonomikë kanë qenë dhe janë dominues për sa i përket nxitësve të emigracionit në Shqipëri, megjithatë në një pjesë të konsiderueshme rastesh shqiptarët preferojnë të emigrojnë edhe për arsye më pak të matshme, si p.sh. mungesa e shpresës se një e ardhme në Shqipëri është e përshtatshme.

Për këtë rekomandoj:

Instituti i Statistikave të publikojë të dhëna më të detajuara në lidhje me faktorët që i shtyjnë shqiptarët drejt emigracionit në botimet e përvitshme. Këto të dhëna të publikohen edhe në faqen web të INSTAT, krahas të dhënave për migracionin.

Menjëherë dhe në vazhdimësi

Instituti i Statistikave, brenda mundësive logjistike dhe në përputhje me Planin Vjetor të Statistikave Zyrtare, të përfshijë edhe popullsinë shqiptare që jeton jashtë kufijve në grumbullimin e të dhënave në lidhje me emigracionin.

Pas ngritjes së Regjistrit të emigrantëve nga strukturat përgjegjëse

Për Pyetjen: A është efiçente MB në koordinimin e zbatimit të strategjisë së migracionit?

Konkluzion:

Hartimi i profileve të migracionit nga Ministria e Brendshme, paraqitja e tyre për miratim në Këshillin e Ministrave, bie ndesh me fushën e veprimit të INSTAT. Ministria e Brendshme nuk ka shfrytëzuar resurset e veta humane dhe logjistike për të mbledhur dhe ruajtur të dhënat për emigracionin e shtetasve shqiptarë.

Mungon përcaktimi i qartë nënligjor për mënyrën e caktimit të Zëvendësministrave të MB në fushën e monitorimit dhe raportimit mbi migracionin. Raportimi i një zëvendësministri tek një zëvendësministër tjetër brenda MB, prish balancën institucionale në këtë ministri. Nuk ka filluar puna në MB për ngritjen e organeve përgjegjëse për monitorimin dhe raportimin e politikave migratore. Sekretariati Teknik është vetëngritur, pa autorizim të shprehur të akteve nënligjore dhe organeve që e krijojnë, për formën, numrin dhe detyrat që duhet të mbulojë.

MB nuk ka bërë raportime periodike për emigrantët shqiptarë në INSTAT. Nuk ruan të dhënat nga punonjësit e Pikave të Kalimit Kufitar, mbi emigracionin me qëllim krijimin e një regjistri emigrantësh. Departamenti i Kufirit dhe Migracionit në MB, nuk ka marrë masa për të mbledhur të dhëna manuale apo elektronike për emigrantët shtetas shqiptarë, për destinacionit ku largohen, llojin e statusit që kanë në vendin ku emigrojnë. Departamenti i Kufirit dhe Migracionit në MB dhe vetë MB nuk ka sensibilizuar shtetasit shqiptarë që largoheshin në vitin 2015 deri në vitin 2017, por këto sensibilizime nisën në tremujorin e fundit të vitit 2017, kur një numër prej mbi 139,760 shtetasish shqiptarë morën urdhër largimi nga BE në 4 vitet 2015-2018, duke kufizuar në të ardhmen lëvizjen e lirë të këtyre shtetasve në hapësirën Schengen.

Për këtë rekomandoj:

Ministria e Brendshme të marrë masa për të propozuar ndryshimet ligjore në ligjin nr. 108/2013, “Për të huajt”, i ndryshuar, si edhe ligjin nr. 9668, “Për emigrimin e shtetasve shqiptarë për motive punësimi”, i ndryshuar, Vendimet e Këshillit të Ministrave që kanë efekte mbi këto detyra ligjore, ku të përcaktohen drejtë detyrimet ministeriale për mbledhje, ruajtje dhe raportime në INSTAT. Çdo publikim mbi migracionin të jenë atribut i INSTAT.

Menjëherë

Ministri i Brendshëm të marrë masa për Emërimin e një zëvendësministri në pozicionin e drejtuesit të Grupit Drejtues për migracionin dhe të njoftojë ministritë përgjegjëse për dërgimin e zëvendësministrave respektiv në këtë Grup Drejtues. MB të marrë masa për ndryshime në Vendimin e Këshillit të ministrave për formulën e funksionimit të Komitetit Teknik dhe të përcaktojë qartë përbërjen e Sekretariatit Teknik dhe nivelin e domosdoshëm të specialistëve që kërkohet nga çdo ministri e institucion që merr pjesë në të.

Menjëherë

Ministri i Brendshëm të marrë masa për krijimin e një udhëzimi për mënyrën e mbajtjes së të dhënave për emigrantët, ku të përfshihen lloji i lejes së qëndrimit që ka në shtetin ku emigron, qytetin dhe shtetin ku jeton, duke përfshirë edhe shtetasit shqiptarë që gëzojnë dyshtetësi. Ministri i Brendshëm të marrë masa për krijimin e një platforme on-line me qëllim lehtësimin e vetë deklaratimit të emigrantëve shqiptarë, për të eliminuar vonesat në kufi, si edhe të krijoj akses në “e-Albania” për çdo emigrant shqiptar kudo në botë që dëshiron të vetëregjistrohet në regjistrin e emigrantëve. Ministri të marrë masa për ndryshime në sistemin FER-TIMS, ku të pasqyrohen të dhënat thelbësore për emigrantët si dhe aksesin e çdo platforme on-line për të lehtësuar vetëdeklarimin e emigrantëve, hedhjen e të dhënave nga Drejtoria e Përgjithshme e Gjendjes Civile mbi emigrantët, hedhjen e të dhënave nga çdo punonjës policie në komunitet dhe në pikat e kalimit kufitar. Këto të dhëna të jenë të aksesueshme në formën e një regjistri për emigrantët.

Brenda datës 31.09.2020

Për Pyetjen: A është efiçiente struktura përgjegjëse për migracionin pranë MFE në zbatimin e detyrave të ngarkuar nga strategjitë?

Konkluzion:

Struktura përgjegjëse për emigracionin dhe imigracionin e punës pranë Ministrisë së Financave dhe Ekonomisë nuk ka staf të mjaftueshëm për të zbatuar në mënyrë efiçente masat e caktuara në Strategjinë Kombëtare të Emigracionit 2019-2022. Aktualisht MFE nuk ka arritur të evidentoj zhvillimin e detyrave të ngarkuara nga strategjitë. Të dhënat e mbledhura nga strukturat e varësisë së MFE në lidhje me shtetasit shqiptarë që duan të emigrojnë apo kthehen në Shqipëri nuk janë përfaqësuese dhe transparente.

Për këtë rekomandoj:

Ministria e Financave dhe Ekonomisë të marrë masa për të analizuar nevojat specifike për forcimin e kapaciteteve për qeverisjen e efiçentshme të migracionit dhe të propozojë e miratojë strukturë të plotë.

Menjëherë

Struktura përgjegjëse për emigracionin dhe imigracionin e punës pranë MFE të marrë masa për evidentimin e procesit të zbatimit të masave të Strategjisë Kombëtare për Migracionin duke hartuar periodikisht dokumente dhe duke i bërë ato transparente.

Menjëherë dhe ne Vazhdimësi

MFE të marrë masa për bërjen funksional të regjistrit të emigranteve, dhe bërjen transparente të të dhënave të sakta rreth shtetasve shqiptare që duan të emigrojnë për qëllime punësimi, atyre që kanë marrë leje përkatëse për tu punësuar jashtë vendit dhe për shtetasit shqiptarë që janë kthyer, bazuar në ligjin Nr. 9668, datë 18.12.2006 “Për Emigrimin e Shtetasve Shqiptarë për Motive Punësimi”, neni 12 dhe Urdhrin Nr. 84 datë 06.06.2011.

Menjëherë dhe në vazhdimësi

Për Pyetjen: A ka vepruar me eficiencë MB dhe MFE në grumbullimin dhe transmetimin e të dhënave të besueshme mbi migracionin?

Konkluzion:

Mungesa e një rrjedhe të qartë informacioni nga institucionet përgjegjëse për migracionin tek INSTAT, në mënyrë që të garantohet saktësi e lartë e të dhënave, ka sjellë neglizhencë në përmbajtjen cilësorë të informacionit që agjencitë statistikore për modulet respektive të Programit Statistikor Zyrtar ofrojnë.

Mungesa e regjistrit elektronik të popullsisë si dhe infrastruktura jo e plotë e mbledhjes, transmetimit dhe përpunimit të informacionit statistikor, lë shteg për të gjykuar mbi programet statistikore dhe të dhënave që ato ofrojnë, duke i pranuar me rezerva si bazë e zhvillimeve politike apo studimeve të mëtejshme.

Mungesa e regjistrit të emigrantëve, si një vakum i krijuar në vite, ofron mangësi dhe cilësi të ulët të të dhënave që prodhojnë agjencitë statistikore në vend në funksion të emigracionit.

Mungesa e modaliteteve dhe përmbajtjes së standardizuar të mbledhjes dhe raportimit të informacionit statistikor në funksion të emigracionit nga MFE, ka sjellë pasaktësi në të dhënat sasiore ku objektivat politikbërës fokusohen për të përmirësuar situatën ekonomike dhe sociale. Kjo mangësi destinon objektiva inefektive dhe jo përfaqësues së realitetit në vend.

Për këtë rekomandoj:

MB dhe MFE në bashkëpunim me INSTAT, të formalizojnë formatet tip të të dhënave administrative dhe statistikore në funksion të hartimit të saktë të Profilit të Migracionit dhe Startegjisë Kombëtare të Migracionit si dhe në harmoni me standardet ndërkombëtare të raportimeve të fushës.

Brenda vitit 2021 dhe në vazhdimësi

Në funksion të identifikimit dhe kryqëzimit të informacionit në kohë reale INSTAT, të krijojë strukturat lidhëse për të kryer testime në pikat kufitare, me qëllim etiketimin e motivacioneve të largimit të shtetasve Shqiptarë nga vendi.

Brenda vitit 2021 dhe në vazhdimësi

MB në bashkëpunim me strukturat e MPJ të hartoj dhe miratoj aktet në zbatim të Ligjit nr. 14/2016 Për identifikimin dhe regjistrimin e adresës së shtetasve shqiptarë që jetojnë jashtë territorit të Republikës së Shqipërisë.

Brenda vitit 2020

MFE në bashkëpunim me SHKP dhe INSTAT të hartojnë Memorandume bashkëpunimi, për të saktësuar tipologjinë e mbledhjes, raportimit dhe afateve të të dhënave statistikore sipas fushës së veprimtarisë dhe përgjegjësisë në Profilin e Migracionit.

Brenda vitit 2020

Për Pyetjen: A raporton INSTAT shifra të besueshme lidhur me fushën e migracionit?

Konkluzion:

Përdorimi i censuseve për matjen e migracionit ka vështirësi dhe kufizime. Censusi i Popullsisë dhe Banesave i cili kryhet çdo 10 vjet, përmban vetëm një numër të vogël pyetjesh dhe nuk mund të numërojë të gjitha ngjarjet e migrimit si familje të tëra që lëvizin, migrimin sezonal/ të përkohshëm dhe qarkullues. Prandaj, censusi nuk mund të përbëjë një burim statistikash vjetore mbi migracionin ndërkombëtar. Për më tepër, mungesa e burimeve të të dhënave administrative, detyron INSTAT të bazohet në anketat sociale si anketa e Forcave të Punës Tremujore.

Është gjerësisht e njohur se të dhënat e migrimit nuk janë të lehta për t'u mbledhur dhe se sistemet e mbledhjes së të dhënave, si dhe përkufizimet e përdorura për të përcaktuar ngjarjet e migrimit, ndryshojnë në mënyrë të konsiderueshme. Kështu, përputhshmëria e të dhënave me flukset migratore janë të nevojshme për një sërë arsyesh, të cilat janë kritike për zhvillimin e një evidence të besueshme mbi politikën e migracionit dhe kërkimet. Mungesa e një përkufizimi standard për matjen e flukseve migratore është një nga vështirësitë kryesore për matjen e migracionit.

Burim potencial i pasaktësisë së mundshme në përlogaritjen e popullsisë banuese është përdorimi i anketës së Forcave të Punës në funksion të matjes së migracionit ndërkombëtar. Problemet që mund të ketë me mbulimin dhe me azhornimin e kampionit për këtë anketë (ku vazhdon të jetë Censusi i fundit si kornizë) mbart shkallë të lartë rrisht dhe gabimi edhe në përlogaritjet e INSTAT mbi modulet e migracionit.

Megjithëse saktësia dhe mbulimi i të dhënave që sigurohen nga regjistrat administrativë për INSTAT, ka ardhur duke u përmirësuar me kalimin e viteve, ende reflektohen probleme në reflektimin e lëvizjeve të brendshme pranë zyrave të gjendjes civile. Si e tillë mungesa e regjistrave të adresave ka sjellë vështirësi në kryqëzimin e të dhënave për popullsinë duke ndikuar në cilësinë e përgjithshme të statistikave.

Për këtë rekomandoj:

INSTAT duke marrë parasysh eksperiencat e vendeve të tjera, të vlerësoj mënyra të reja për matjen e migracionit, si ajo e kryerjes së anketave specifike dhe përdorimin e statistikave pasqyrë.

Brenda 6 mujorit të dytë të 2022 dhe në vazhdimësi

INSTAT të vlerësoj nëpërmjet një raporti ku të cilësoj boshllëqet dhe vështirësitë në funksion të përmirësimit, mbledhjes, analizimit dhe ndarjes së të dhënave administrative për migracionin, duke i ndarë me të gjitha ministritë e linjës përgjegjëse për menaxhimin e migracionit në vend si dhe duke sugjeruar modelin të ri standard për mbledhjen e tyre.

Brenda 6 mujorit të parë të 2021

INSTAT në funksion të përdorimit të informacionit real, të bashkëpunoj me MB për hartimin e modaliteteve të përdorimit të sistemit të përbashkët të të dhënave mbi popullsinë dhe migrantët duke zbatuar njëherësh edhe rolin e saj koordinues për Sistemin Kombëtar të Statistikave në përmbushje të detyrimeve që rrjedhin prej nenit 13 të Ligjit nr. 17/2018 Për statistikën zyrtare.

Brenda vitit 2022 dhe në vazhdimësi

INSTAT bashkëpunim me MB të hartojnë programe dhe metodologji mbi shkëmbimin e të dhënave midis vendeve pritëse të emigrantëve shqiptar si dhe të përgatiten procedurat për vlerësimin e flukseve migratore të raportuara.

Brenda vitit 2021 dhe në vazhdimësi

Në përputhje me nenin 30 të Ligjit 154/2014 “Për Organizimin dhe Funksionimin e Kontrollit të Lartë të Shtetit”, me ndjekjen dhe kontrollin e zbatimit të detyrave dhe masave të përcaktuara në këtë vendim ngarkohet Departamenti i Auditimit të Performancës.

K R Y E T A R

Arben SHEHU